

Cama Tsətsəfə Nə Bulusu Nə Məthləu Anə Njir Tasalonika

Usa Dzau

¹ Cama tsətsəfə kə sara ara Bulusu, ənga Silasu, ba ənga Timathlawusu.

A nda nə dabə dzə njir nu kəra wu məlmə Tasa-lonika, kəra nə Hyal Dərmən ənga Thlagə Yesu Kərsiti.

² Bəgə mayiwakur ənga hudə pərtəu sara ara Hyal Tada ənga Thlagə Yesu Kərsiti nda nggya ənga hyi.

Lə Usaku Ənga Kədi Hyal

³ Kakal nga nyi 'ya na usaku anə Hyal cumu aga hyi, nahyi wazha ama, ara mbərsar hyi a vər cakə gagaɖau, ənga yiwu kəra hya vər yiwu kərhyi a vər cakau.

⁴ Agabangau, 'ya vər ɓwasau ənga hyi wu dabə dzə njir nu Hyal paməpamə arya səsə'wu sə ənga mbərsar hyi wu patər ɖa dzə paməpaməu ənga ng-gya dzadzau kəra hya vər səsə'wuri.

⁵ Kalar sə'yar kau ca ngə cabiya numa nə Hyal tsa'a nga nyi, arya kau nja nda jigəwa hyi wu njira a ɖari kakal nda gwu təlkur Hyal kəra hya vər sa ɓwaɓwatə aga nyi.

⁶ Hyal ndə tsapə ngau, ju nda kina ənga ɓwaɓwatə anə njira vər lə ɓwaɓwatə anə hyi.

⁷ Ənga tsu, ju nə hyi ɓəlsar, nahyi kəra a vər sa ɓwaɓwatə əkkə'yi na'ya tsu ma Thlagə Yesu cabiya

kər sara dəməlmau wu u'u mbəmbau ənga waladi nyi'yar.

⁸ Ju sa nə nyi ɓwaɓwatə anə njira gəra sən Hyal ənga njira piyari nu ndəshigu nə Thlagər mən Yesu.

⁹ Ndu nda sa ɓwaɓwatə kəra gəra kudau, ənga na ndu nda lari bama Thlagəu ənga kadakadarkur nə dənama nyi mai.

¹⁰ Sə'yar kə wu nda da, ar pəcira ji shida, aga nji cicau ndu sa nə nyi kadakadarkur, patə njira hənggəri ndu nda gənggər nyi səli. Ənggau, patə əkkə'yi nahyi, ara a hənggər hyi ənga sakida kəra 'yi nar hyi.

¹¹ Ənga najaka sə a wu kər, 'ya vər kədi Hyal anə hyi cumu, aga Hyalər mən ja jigəwa hyi wu ngga nyi, ənga dənama nyi nga ju nda nyabiya kalar sə mənəhə kəra hyi məl ənga kalar sərə dəfuwa hyi nər hyi lagur mbərsar hyi.

¹² 'Ya vər kədi Hyal kau, aga nja nə nyi kadakadarkur anə thləmə Thlagər mən Yesu wu hyi, ənga nahyi tsu, hyu uya kadakadarkur wu ja. Sə kə wu dər kər lagur mayiwakur nə Hyalər mən ənga Thlagə Yesu Kərsiti.

2

Ndər Hya'a Hangəkal

¹ Ar kəra shilər Thlagər mən Yesu Kərsiti ənga sa ɓər mən papatəu əkkə'yi ja, 'ya vər kədi hyi wazha ama,

² a sara hya gərahə wu dəfuwa hyi kusakusa mai alaga hangəkala hyi a hya'ari mai, abər pəcir shilir Thlagəu a kufa shiliri mai. Ma vanyi, abər vanyi ndə a nar hyi ri abangau, lagur ndər haha, alaga

cama tsətsəfau, alaga ndər papahəu, alaga nja na abər cama ngau sara ara 'ya.

³ A sara hya piyari kalar ndau a nggutana hyi alaga abari mai, ara pəci ta a'yi shili mai, kəl ma gəra nggandərkur kə də kwatahəu, ənga ma ndər hya'a hangəkal ta cabiya dzau, naja ngə ndəra nji fiya nyi aga sa.

⁴ Naja ngə ndəra wu tsamə kərnəni ənga kadakadarkur, ju nda pari kalar səra nju ngga ənga Hyal, ənga kalar sər dləvau. Ju nda fiya kərnəni ar vir nggya wu ki Hyal, ənga ju fiya kərnəni ar viya Hyal.

⁵ Nahyi a'yi a dəngari wa, yu na sə'yar kau anə hyi ar pəcira mən ar vira zəməu?

⁶ Kabangəkau a sən hyi səra a vər kar nyi, aga kəl ma pəci nyi a dəri nga ja dzəgwa cabiya dzau.

⁷ Ara ndər hya'a hangəkal kə a vər məl thlər dədəwa kabangəkau, a nggyar ja dədəwa kəl ma ndəra vər kar nyi ara biyar babal kə bəna dzau.

⁸ Ba ndər hya'a hangəkal ka dzəgwa cabiya dzau, ndəra Thlagəu Yesu wu nda tsiya nyi ənga sə pi sara wu miya ja, ənga ja dzəgwa wushina nyi ənga kadakadarkur nə shili nyi.

⁹ Ndər hya'a hangəkal kau, ju nda shili ənga dənəma sara ara shatan, ja dzəgwa sana liya nji ənga məl sə dədəgur ənga mətsam pampaməu.

¹⁰ Ənga ja nda nggutana njira ar lagu sasa ənga kalar sə dəmwa 'yi kəra wu səkwa dzau, ara ndə piyari yiwu jiri kəra wu nda kətiya nda.

¹¹ Arya najaka sə ngə Hyal a nda shabiya hangəkala nda aga nda hənggər ənga fatiya nyi,

¹² aga abangə nju nda thlana nda numa patəu,

ara na ndə hənggəri ənga jirkur mai, ama ndə yiwu dəmwa'yikur.

Hya Nggya Ənga Jirkur

¹³ Kakal nga nyi 'ya lə usaku anə Hyal cumu arya hyi, nahyi wazha ama kəra Thlagə a yiwu, ara Hyal ngə cadəbiya hyi aga hya da wu nji tanggərma kəra uya mbədə lagur Mambəl, ca ngə məliya hyi cici ənga lagur hənggəri wu jiri.

¹⁴ Aga kə nga ji ngga hyi, lagur ndəshigu 'ya kəra 'yi nə hyi, aga hya uya kadakadarkur nə Thlagər mən Yesu Kərsiti.

¹⁵ Agabəngau, wazha ama, hya ciya dzau ənga hya səbiya highiḃə 'yar kə 'yi nə hyi kau, alaga ənga miya ba lagur cama tsətsəfau.

¹⁶ Bəgə Thlagər mən Yesu Kərsiti ənga kərnyi ba Hyal Tada, kəra cabiya mən yiwukur, ja nə mən tsətsəku dəfu kəra gəra kudau ənga fər kər mənəhəu.

¹⁷ Bəgə ja nə hyi tsətsəku dəfu, ənga ja nə hyi dənəma wu patər sə mənəhəu kəra hyu məl ənga sərə hyu na.

3

Bulusu Wu Yiwu Nja Kədi Hyal Anə Nda

¹ Wu joməya nyi, wazha ama, 'ya vər kədi aga hya kədi Hyal anə 'ya. Hya kədi Hyal aga ndəshigu nə Thlagəu a tətəlnəkər kusakusa, ənga aga ja da ənga kadakadarkur, ənggər kəra ji shili anə hyi.

² Ənga tsu hya kədi Hyal, aga nja kətiya 'ya ara nji dəmwa'yu ənga nji shishi, ara a'yi kalar nji ngə ənga mbərsa mai.

³ Ama Thlagə ndə tsa'a miya dəfu ngau, ju nda nə hyi dənəma, ənga ja kətiya hyi ara nji dəmwa'yu.

⁴ A mbərsar 'ya ənga Thlagəu abər hya vər məl sərə 'yi na aga hya məl, ənga tsu hya dumwa ənga məl nda.

⁵ Bəgə Thlagəu ja tsəkwar dəfuwa hyi aga hya sənbiya yiwukur nə Hyal, ənga səsəu sə lagur Kərsiti.

Məl Thlər Sə Mənahə Ngau

⁶ Wazha ama, 'ya vər na anə hyi wu thləmə Thlagər mən Yesu Kərsiti, abər hya təkə ənga kalar zamə hədəwa, ənga naja a'yi wu yiwu məl thlər ənga sərə hyi highibəri ara 'ya mai.

⁷ Nahyi ənga kərhyi, a sən hyi ənggər kərə kikyau hya fa'abiya hiya sərə 'yi məl. Wu pəcira 'ya əgya hyi na 'ya a'yi nggya dzafə mai.

⁸ Ənga tsu na'ya a'yi wu səm sər səm nji gərə kina mai. Ama a sar 'ya bwaḃwatə vu'yi ənga puci a vər məl thlər, aga 'ya sara da sə tədəbə anə hyi.

⁹ Sərə da 'yi məl abangau, ara a'yi 'ya gərə dənama nə yiwa aga hya dləwar 'ya mai, ama aga 'ya da sər fə li kərə hyu fa'abiya hiya nyi.

¹⁰ Wu pəcira mən ar vira zəməu, a nar hyir 'ya abər ma ndə nggəl ara məl thlər, a sara nja lə sər səm anə nyi mai.

¹¹ 'Yi na abangə ara 'yi nggari abər alenyi nji wu hyi, nji hədəwa ngau, thlər məl a'yi ara nda mai, kəl nggya aga jiba njir məl thlər.

¹² Culi najaka nji 'ya vər tədə himiya nda ənga nə nda sər bəla wu dənama nə Thlagə Yesu Kərsiti aga nda məliya kərnda, nda məl thlər aga nda uya dəfə kərə nda səm.

¹³ Nahyi tsu, wazha ama, a sara hya hədə ənga məl sərə tsa'a mai.

¹⁴ Kalar ndəra nggəl ara nu səra 'yi nana a gwar cama tsətsəfə kau, hya fər li mənəhəu ar ja. A sara hya daḅər kər ənga ja mai, aga ja gu səli.

¹⁵ Ama a sara hya fiya nyi ar viya dawa mai, ama hya tədə himiya ja ar viya zər ama.

Fə Barka

¹⁶ Bəgə Thlagə ənga kərnyi ndər lə hudə pərtəu, ja nə hyi hudə pərtə cumu wu kalar lagu. Bəgə Thlagə ja nggya ənga hyi patəu.

¹⁷ Nayi Bulusu ngə tsəfə najaka usa dzau ənga tsa yau. Kə ngə sakida nə kalar cama tsətsəfə də. Ənggər kə nga yu tsəfau.

¹⁸ Bəgə mayiwakur nə Thlagər mən Yesu Kərsiti ja nggya ənga hyi patəu. Amina.

Ndəshigu'yar Fodəu Ənga Thlər Cama'yar
The New Testament in the Marghi South language of
Nigeria: Ndəshigu'yar Fodəu Ənga Thlər Cama'yar

copyright © 2024 The Seed Company

Language: (Marghi South)

Contributor: Initiative for the Translation and Development of African Languages

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

63471087-0de7-5f4b-aa1f-ca2e66571a95